





REGIONE AUTÒNOMA DE SARDIGNA
REGIONE AUTONOMA DELLA SARDEGNA



COMUNU DE SESTU
TZITADI METROPOLITANA DE CASTEDDU



Ddu sciiast?



In custas cidas eus intèndiu chistionai a fitianu de sa reina Elisabeta II, ma ddu scieis chini est sa primu reina de Sestu?

A innantis de intrai in sa chistioni depeus fai una premissa pitica. Sa reina chi nd'eus a contai est bìvia in su mesuevu, intra de s'acabu de su milli e centu e s'inghitzu de su Duxentus.

In cussu tempus sa bidda de Sestu s'agatàt in su Giudicau de Casteddu, nomenau de Càlari o de Plùminos, su prus mannu e arricu de is cuàturu rennus independentis chi nci fiant in Sardìnnia.

In su 1211 su giuigi de Càlari Gulliellmu de Massa iat assotziau sa filla manna Benedita a su scannu de su giuigau, aparicendi sa coja de issa cun su fillu de su giuigi Perdu de Arbarè, Barisoni, chi iat fatu inserrai in sa presoni de Santa Ilia (sa capitali de su giugau de Càlari chi s'agatàt in sa perra nord-occidentali de sa Casteddu de oi, a suta de su bixinau de Santa Tennera prus o mancu) candu iat ocupau su giudicau insoru, po ddu podi allobai a su suu.

Mortu su babu in su 1214 dd'iant decrarada giuigissa po deretu de aredeu in unu atòbiu mannu de su cleru, de is nòbilis e de su pòpulu. S'arci-obispu Rico dd'iat intregau su bàculu de su cumandu e issa iat giurau de non donai a nisciunu stràngiu su governu ni de sminguai su territòriu de su giudicau ni de donai casteddus sena de su permissu de is mayorales (is meris arricus chi donànt cunsillu a is giugis).

Custa giura perou non dd'iat onorada ca in cussus annus s'influèntzia de sa Repùbrica marinara de Pisa si fiat fata prus manna, tanti chi su cònsuli pisanu Ubaldo Visconti dd'iat custringa cun sa fortza e cun unu esèrcitu a fatu a giurai fidi a su Comunu de s'Arno e a ddi donai su cùcuru innui is pisanus ant fundau su Castrum novo Montis de Castro chi oi conosceus cumentu Casteddu de Susu.



REGIONE AUTÒNOMA DE SARDIGNA
REGIONE AUTONOMA DELLA SARDEGNA



COMUNU DE SESTU
TZITADI METROPOLITANA DE CASTEDDU



In totu sa vida sua Benedita at circau sèmpiri de fai is interessus de su giuigau de Calari, pedendi agiudu a sa Santa Sea, cojendi su legìtimu aredeu de su giuigau de Arbarè po cumbati impari is pisanus opuru circhendi alliantzia cun is genovesus, ma is fortzas chi depiat poderai fiant grais meda po issa. Est morta in su 1232 in Massa, innui teniat domus e siendas aredadas de su babu, a tesu de domu sua e circhendi sèmpiri de apariciai sa conchista de su giuigau chi non medas annus prus a trigadiu ant conchistau e spartziu a pustis de un alliantzia de is pisanus cun totus is àterus giuigaus chi in s'interis fiant passaus a suta de s'influèntzia pisana.

